

Bilten

April 2026.
Izdanje br. 38

Općinskog suda u Sarajevu



Općinski sud u Sarajevu
Opћински суд у Сарајеву
Sarajevo Municipal Court



Predstavljene aktivnosti sarajevskog Općinskog suda u proteklom periodu

Za četiri godine riješeno skoro milion predmeta

U prostorijama biblioteke Općinskog suda u Sarajevu 24. marta 2026. godine održana je prezentacija ključnih rezultata rada i aktivnosti Suda u protekle tri i po godine. Događaju su prisustvovali predstavnici Visokog sudskog i tužilačkog vijeća BiH (VSTV BiH), Centra za edukaciju sudija i tužilaca FBiH, te Kantonalnog i Općinskog suda u Sarajevu.

Tom prilikom promovisan je i Priručnik za stručno osposobljavanje administrativnog osoblja suda.

Damir Batotić, predsjednik Općinskog suda u Sarajevu, istakao je da je u periodu od četiri godine, i to 2022. do 2026., **riješeno skoro milion predmeta (964.294)** te da su zaostaci drastično smanjeni. Poseban uspjeh ostvaren je u pogledu rješavanja najstarijih predmeta kojih je samo tokom 2025. godine riješeno više od **75%**, pri čemu je značajna činjenica da je sud u tom periodu, u prosjeku, na godišnjem nivou zaprimao 186.137 predmeta, a rješavao 241.073. U cilju unapređenja dostupnosti i efi-

kasnosti usluga građanima, sud je realizovao niz projekata. Između ostalog, izvršena je zamjena zastarjele informatičke opreme, za što je izdvojeno oko milion KM. Također, arhivska građa dužine 11 kilometara po prvi put je objedinjena na jednoj lokaciji na Zetri, čime je znatno unaprijeđena organizacija rada. Uspješno je riješen i dugogodišnji problem anonimnih dojava o postavljenim minsko-eksplozivnim napravama. Na kraju, predstavljeni su najznačajniji projekti koji su realizovani u sudu tokom ovog perioda.


“Ovi rezultati su plod zajedničkog rada svih uposlenika suda. Fokusirali smo se na efikasnost i rješavanje dugogodišnjih zaostataka, a što su građani odmah prepoznali” naglasio je predsjednik Batotić.

Boris Stojaković, šef Odsjeka sudskih izvršitelja, prezentovao je rad novouspostavljenog “**Call centra**” i **Aukcijskog centra**, a koji su omogućili enormno povećanje naplate potraživanja te smanjenje broja komunalnih predmeta.

Zbog ovih inovacija, VSTV BiH je imenovao Općinski sud u Sarajevu za **mentora ostalim sudovima u BiH** u oblasti izvršnog postupka. Stojaković je zahvalio predsjedniku Batotiću na ukazanom povjerenju i viziji koja je bila temelj pokretanja i realizacije ovih reformi.

Prisutnima se obratila i Irnela Podgorica Omerović, stručna savjetnica za prevođenje i edukaciju, koja je predstavila Priručnik za stručno osposobljavanje administrativnog osoblja Općinskog suda u Sarajevu kao jedinstveni edukativni materijal ove vrste u BiH. Ovaj priručnik izrađen je s ciljem da novozaposlenim državnim službenicima i namještenicima olakša razumijevanje radnih zadataka, ali i da svim zaposlenicima pruži uvid u nadležnosti i funkcije pojedinih odjeljenja unutar suda.

Nakon prezentacije uslijedilo je obraćanje prisutnih te je opći zaključak da je ostvarenim rezultatima rada Općinski sud u Sarajevu potvrdio status jedne od najažurnijih i najmodernijih ■



Objavljen Priručnik za stručno osposobljavanje administrativnog osoblja Općinskog suda u Sarajevu

Općinski sud u Sarajevu izdao je jedinstveni Priručnik za stručno osposobljavanje administrativnog osoblja, prvi ovakve vrste u Bosni i Hercegovini. Ovaj edukativni materijal koji sadrži 150 stranica, ima za cilj olakšati novoza-poslenim državnim službenicima i namještenicima razumijevanje njihovih radnih zadataka te omogućiti svim zaposlenicima bolji uvid u nadležnosti i funkcije različitih odjeljenja unutar suda.

Priručnik je osmišljen kao podrška efikasnijem obavljanju radnih za-

dataka, te kao alat koji će olakšati rotaciju uposlenika unutar administracije.

Etički kodeks Općinskog suda u Sarajevu, koji je sastavni dio ovog Priručnika, pruža jasne upute kod mnogih etičkih nedoumica i postupanje po odredbama ovog Kodeksa ima za cilj jačanje svijesti o ličnoj i profesionalnoj odgovornosti svih zaposlenika za zakonito, savjesno i efikasno izvršavanje službenih dužnosti.

Pravilnik o unutrašnjoj organizaciji i sistematizaciji radnih mjesta Općinskog suda u Sarajevu defini-

še opis poslova svakog državnog službenika i namještenika, dok Priručnik pruža detaljnije pojašnjenje načina obavljanja pojedinih radnih zadataka i predstavlja oslonac uposlenicima u svakodnevnom radu.

Stručno usavršavanje je pravo i dužnost svih zaposlenika, te će ovaj Priručnik biti koristan alat za njihov profesionalni razvoj i svakodnevnu praksu.

Priručnik je zajednički resurs za unapređenje rada svih zaposlenika Općinskog suda u Sarajevu. Također, njegov sadržaj će se redovno ažurirati u skladu sa izmjenama prakse i potrebama rada, a planiran je niz internih radionica zasnovanih na materijalu iz ovog Priručnika. ■



Pregled najznačajnijih aktivnosti Općinskog suda u Sarajevu za period 2022.-2025. godina

Općinski sud u Sarajevu je u prethodne tri godine realizovao niz važnih projekata i mjera s ciljem unapređenja efikasnosti, dostupnosti i kvaliteta usluga koje pruža građanima, kao i jačanja transparentnosti rada i boljih uslova za korisnike i zaposlenike.

U cilju **unapređenja dostupnosti i efikasnijeg pružanja usluga građanima**, sud je poduzeo sljedeće:

- Reorganizacijom rada u šalter sali zemljišnoknjižnog ureda i prilagođavanjem radnog vremena potrebama građana, omogućeno je efikasnije postupanje po zahtjevima stranaka. Ujedno, u saradnji sa MUP-om Kantona Sarajevo kojem je dat pristup elektronskoj zemljišnoj knjizi, građanima je omogućeno izdavanje ličnih dokumenata bez prethodnog dolaska u Zemljišnoknjižni ured.
- Uspostavljanjem šaltera za prodaju sudskih taksi u Auli suda od maja 2024. godine uveliko je olakšano građanima podnošenje zahtjeva, bez potrebe za odlaskom izvan zgrade suda radi ku-

povine takse. Također, ukidanjem kolektivnog godišnjeg odmora omogućeno je kontinuirano pružanje sudskih usluga tokom cijele godine, što je naišlo na izuzetno pozitivan odjek među korisnicima.

- Uvođenje elektronskih rješenja dodatno je unaprijedilo komunikaciju sa strankama. Postavljanjem linka Oglasne ploče Registra na web stranicu suda, stranke mogu pratiti status svojih predmeta i iznos taksi bez dolaska u sud. Korištenjem QR kodova u pisarnicama Registra omogućen je brži pristup informacijama o osnivanju društava, potrebnoj dokumentaciji i obrascima, čime su smanjene gužve i ubrzan proces rada.
- Riješen je dugogodišnji problem anonimnih dojava o postavljenju bombi te se pri anonimnim dojavama više ne vrši evakuacija zaposlenika i ne obustavlja proces


rada, a što je godinama uzrokovalo odlaganje velikog broja ročišta, velike zaostatke u radu suda, uzrokovalo enormne troškove kako po budžet suda, tako i za stranke koje su dolazile iz drugih kantona u Općinski sud ili čak iz drugih država, a kako bi pristupili ročištu.

- Objavljivanjem biltena, redovnim informisanjem predstavnika medija o aktuelnim dešavanjima u sudu te uvođenjem smjernica za konkursne procedure, sud je ojačao povjerenje javnosti i osigurao pravednije i otvorenije postupke zapošljavanja.

Također statistički podaci pribavljeni od IKT službe ukazuju na veliku posjećenost facebook i web stranice suda te povećan interes javnosti za rad suda.

U cilju **poboljšanja uslova rada i sigurnosti, u zgradi suda** vrši se kontinuirano održavanje i unapređenje infrastrukture, čime se posljedno stvaraju bolji uslovi za rad zaposlenika i boravak stranaka. U tom smislu izvršeno je unapređenje tehničkih i prostornih uslova rada i poboljšanje sigurnosnih mjera u zgradi suda.

Općinski sud u Sarajevu je u prethodnom periodu iz budžetskih sredstava suda izvršio značajna ulaganja u digitalizaciju i tehničku opremu. Značajna ulaganja izvršena su u računarsku opremu, nabavku printera i novih vozila za potrebe izvršitelja, kao i u rekonstrukciju i klimatizaciju prostorija, čime su unaprijeđeni uslovi rada za zaposlenike. Uz podršku Vlade Kantona Sarajevo, u 2025. godini Općin-






ski sud u Sarajevu je iz budžetskih sredstava izvršio nabavku kompjuterske opreme u visini od **722.109 KM**. Riječ je o zamjeni zastarjele kompjuterske opreme novom te je u tu svrhu kupljeno **322 novih računara** sa licencama za softver kao i **70 printera**.

Uz kompjutersku opremu, iz budžetskih sredstava u 2025. godini izvršena je i nabavka audio-vizuelne opreme za snimanje sudskih ročišta u sudnicama, savremena IP telefonska oprema (za prijenos glasa koriste se internet protokoli umjesto tradicionalnih telefonskih linija), telefonska centrala za prihvata i snimanje poziva te oprema za Pozivni centar (Call centar) u sklopu telefonske centrale (vrijednost 155.000 KM), kojom su povezana izdvojena sudska odjeljenja i omogućen rad „Call

centra“ u izvršnim predmetima. Telefoni koji omogućavaju snimanje razgovora i registraciju broja pozivaoca su instalirani sudijama na svim odjeljenjima suda. Iz navedenih sredstava nabavljena je i oprema za digitalno oglašavanje unutar suda – displeji i ekrani, kojima se korisnicima pružaju informacije o sudskim ročištima, servisne informacije i sl.



Sudnica broj 3 Općinskog suda u Sarajevu u potpunosti je rekonstruisana. Ista je opremljena savremenom audio i video opremom, a što će ubuduće znatno olakšati rad sudskim asistentima i uposlenicima IKT Odsjeka. Sudnica je rekonstruisana od budžetskih sredstava Općinskog suda u Sarajevu.

U saradnji sa Vladom Kantona Sarajevo i drugim nadležnim institu-

cijama sud je realizovao niz infrastrukturnih projekata, uključujući zamjenu stolarije na zgradi sudskog odjeljenja na Ilidži, potpunu klimatizaciju zgrade, rekonstrukciju lifta i najveće sudnice. Posebna pažnja posvećena je sigurnosti objekta i zaposlenika kroz postavljanje sigurnosnih vrata, video-nadzora i kontrolisanog pristupa kancelarijama.

Rekonstrukcija zgrade na Ilidži u kojoj je smješteno Odjeljenje za sporove male vrijednosti ovog suda započela je u septembru 2024. godine. Ova aktivnost provodi se u sklopu projekta “Energetske efikasnosti” Vlade Federacije BiH, putem Federalnog Ministarstva prostornog uređenja, a u saradnji sa Federalnim zavodom za geologiju. Po okončanju svih radova znatno će se unaprijediti uslovi za rad zaposlenika ovog sudskog Odjeljenja te omogućiti adekvatno poslovno okruženje za stranke koje ostva-

ruju svoja prava u ovom sudskom Odjeljenju.

Trenutno su radovi u završnoj fazi, a ovom prilikom zahvaljujemo se Vladi FBiH, Ministarstvu prostornog uređenja FBiH i Federalnoj geodetskoj upravi koji su pokrenuli inicijativu za provođenje projekta “Energetska efikasnosti” i dali nesebičnu podršku tokom realizacije istog.

U okviru kontinuiranih aktivnosti na unapređenju efikasnosti rada i kvaliteta usluga prema građanima, Općinski Sud u Sarajevu je realizovao niz savremenih tehnoloških rješenja usmjerenih na smanjenje gužvi, bolju organizaciju prijema stranaka i unapređenje informisanosti svih korisnika sudskih usluga. Centralno mjesto u ovom procesu zauzima implementacija modernog softverskog sistema za detekciju gužve u šalter-salama suda čime se stvara uređeniji i funkcionalniji ambijent, uz poštivanje vre-


mena građana. Sistem je uspostavljen 22.12.2025 godine s osnovnom funkcijom da odmah detektuje gdje dolazi do gužve i omogućava promptno djelovanje – otvaranje dodatnih šaltera, preusmjeravanje stranaka i bolje organizovanje rada službenika. Sve navedeno povećava efikasnost institucije, omogućava optimizaciju radne snage i prostora.

Radi dodatnog olakšavanja snalaženja unutar zgrade Općinskog suda u Sarajevu, postavljeni su i QR kodovi putem kojih građani mogu pristupiti digitalnoj mapi suda i brzo pronaći odgovarajuće odjeljenje ili kancelariju. Ovo rješenje je naročito značajno za stranke koje se prvi put susreću sa sudskim procedurama ili ne poznaju raspored prostorija unutar zgrade Suda.

Primjenom ovih savremenih tehnoloških rješenja, ovaj sud potvrđuje svoju opredijeljenost ka digitalizaciji, transparentnosti i stvaranju efikasnijeg i pristupačnijeg pravosudnog sistema usmjerenog na potrebe građana i unapređenje ukupnog korisničkog iskustva.

U cilju poboljšanja sigurnosnih uslova u zgradi suda, Vlada Kantona Sarajevo je obezbijedila 63.000,00 KM.

Navedena sredstva su tokom 2025. godine korištena za nabavku sigurnosnih vrata u različitim dijelovima zgrade, a na kojima će se instalirati čitači kartica i čitač bar-kodova (za pozive strankama na ročišta) te će ulazak i kretanje stranaka bez poziva biti strogo ograničeno unutar zgrade suda. Cilj je povećati sigurnosti sudija i nesudskog osoblja, čime se smanjuje mogućnost inci-



dentnih situacija, a što će u konačnici doprinijeti uređenijem sistemu rada suda, kontroli ulaska stranaka i evidenciji uposlenika, kao i smanjenju izloženost sudija ex parte komunikaciji. Navedeno ne predstavlja samo tehničku mjeru, već je važan element zaštite sudijske nezavisnosti, sigurnosti zaposlenih i profesionalnog ugleda suda.

Općinski sud u Sarajevu je inicirao da Vlada Kantona Sarajevo obezbijedi sredstava u iznosu oko 330.000,00 KM za izradu projektne dokumentacije za sanaciju vanjske stolarije i fasade, potpunu klimatizaciju zgrade, izgradnju arhive ZK ureda u dvorištu zgrade kod šalter sale ZK ureda te za uređenje dvorišta između Rektorata UNSA i


ovog suda. Ove aktivnosti u koje su uključeni Vlada Kantona Sarajevo, Kantonalni sud u Sarajevu, Rektorat UNSA te Pravni fakultet UNSA, isključivo su posljedica inicijative koju je uputio ovaj sud za rješavanje ovih dugogodišnjih infrastrukturnih problema.

Također, Općinski sud u Sarajevu kontinuirano provodi aktivnosti na unapređenju transparentnosti. Shodno tome, veliki video zid je postavljen u holu zgrade Općinskog Suda u Sarajevu, a na kojem se prikazuju korisne i jasno strukturirane informacije namijenjene građanima. Putem video zi-

da dostupni su rasporedi suđenja svih sudskih odjeljenja, osnovne smjernice za kretanje kroz zgradu suda, kao i druge važne obavijesti koje strankama omogućavaju

brzu orijentaciju odmah po ulasku u sud. U okviru svakog sudskog odjeljenja postavljeni su monitori na kojima se u realnom vremenu prikazuju detaljni rasporedi suđenja. Ovi prikazi sadrže precizne informacije o broju predmeta, strankama u postupku, vrsti i fazi sudskog postupka, vremenu održavanja ročišta, kao i broju kancelarije ili sudnice. Na ovaj način strankama se omogućava potpun i transparentan uvid u relevantne podatke, bez potrebe za dodatnim zadržavanjem ili obraćanjem službenicima. Na ovaj način Općinski sud u Sarajevu postaje pristupačniji građanima. Također, u tu svrhu je u Prijemnoj kancelariji suda postavljen novi pult za prijem stranaka čime se korisnicima usluga dodatno olakšava ostvarivanje njihovih zahtjeva.

Značajano je poboljšan **status i položaj zaposlenika suda** te su u tom pravcu poduzete mnoge aktivnosti. Primjenom MELP programa uređene su personalne evidencije zaposlenika. Zbog prethodnog načina vođenja personalnih evidencija iste su bile vrlo često nepouzdana. Nakon što je uposlenicima u Upravi suda omogućena adekvatna obuka u vezi sa navedenim programom, isti su u drugoj polovini 2023. godine započeli proces unošenja podataka u MELP program, za svakog zaposlenika suda. Za realizaciju ovih aktivnosti i tačnost podataka koje se unose u program u 2023. godini izdvojeno je 5.000,00 KM (za dostavljanje izvoda za svakog zaposlenika iz PIO). Radi se o vrlo složenom i obimom procesu imajući u vidu da je riječ o najvećem




▲ Arhiva nekada i sada



▲ Odsjek sudskih izvršitelja

sudu u BIH sa trenutno više od 500 zaposlenih. Nakon što je od strane odjela IKT VSTV BIH okončana periodična obuka za uposlenike suda od 2025. godine, u ovom sudu se primjenjuje MELP program. Sa ciljem omogućavanja bolje zdravstvene zaštite putem zaključenog ugovora o dobrovoljnom kolektivnom osiguranju sa ASA Osiguranjem, zaposlenicima suda je omogućeno da obavljaju sistematske preglede pod povoljnim uslovima.

U cilju boljeg čišćenja prostora, kancelarija i toaleta, nakon saglasnosti Kantonalnog ministarstva finansija KS i Ministarstva pravde i uprave KS, izvršen je prijem novih 12 zaposlenika za održavanje čistoće prostorija Općinskog suda u Sarajevu, a koje su počele sa radom 21.12.2025. godine. Imajući u vidu činjenicu da se u postupku javne nabavke prijavljivao sa-



mo jedan ponuđač koji nije pružao usluge čišćenja na zadovoljavajući način, preduzete su aktivnosti kako bi se trajno riješio ovaj problem. U oktobru 2025. godine izvršena je nabavka mašine za čišćenje podova kapaciteta oko 1500 m²/h te nabavka sedam usisivača za potrebe rada novih 12 uposlenika na održavanju higijene. Također, za ovu namjenu su obezbjeđena odjeća i

obuča za te zaposlenike te oprema i sredstva za čišćenje. U 2026. godini planirana je nabavka dodatne opreme za održavanje higijene.

Od jula 2025. godine interna dostava pošte za Kantonalni sud u Sarajevu te Kantonalno tužilaštvo Kantona Sarajevo vrši se uz primjenu bar-kod čitača. Na ovakav način umjesto manuelnog načina vođenja evidencija o otpremljenoj pošti za ove institucije vrši se na savremeniji način. U tom pravcu, razvijen je i poseban program od strane Službe

otpreme i Odsjeka za IKT za ove potrebe. Također, u perspektivi je korištenje ovog novog načina rada i prema drugim pravnim licima.

Najznačajniji i najzahtjevniji projekat završen u 2025. godini jeste proces izmještanja arhivske građe Općinskog suda u Sarajevu na lokaciju Olimpijskog kompleksa Zetra, okončan krajem 2025. godine, a u kojem je 11 kilometara sudskih spisa koji su arhivirani prebačeno sa dvije lokacije u naselju Dobrinja u novi arhivski prostor na Zetri, dok je istovremeno otpisano oko 92.000 spisa. Izmještanje arhive predstavlja jedan od najkompleksnijih projekata suda u posljednjih deset godina, a realizovano je uz podršku Vlade Kantona Sarajevo i Ministarstva finansija KS. Pored poboljšanja uslova za rad uposlenika Odsjeka za arhivske poslove, ovaj projekat je značajan radi očuvanja arhivske građe koja je do sada bila smještena u neadekvatnim podrumskim prostorijama objekata na Dobrinji koji su često bili izloženi

poplavama kanalizacionih i otpadnih voda, a što je višestruko ugrožavalo arhivsku građu.

Izmještanjem arhivske građe u adekvatnije i funkcionalnije prostorije, sud je napravio značajan iskorak u unapređenju uslova za čuvanje i upravljanje dokumentacijom. Nova prostorije obezbjeđuju bolje tehničke i sigurnosne uslove, veću preglednost i efikasniji pristup spisima, što će doprinijeti bržem i kvalitetnijem radu Odsjeka za arhivske poslove.

Ova aktivnost predstavlja jedan od najzahtjevnijih logističkih poduhvata, realizovana uz maksimalno zalaganje zaposlenih i dobru organizaciju rada. Izmještanjem i adekvatnim smještajem arhivske građe stvoreni su preduslovi za dugoročno očuvanje arhivske građe ali i za unapređenje ukupne efikasnosti rada suda.

Tokom perioda 2023.–2026. godina, u cilju poboljšanja uslova rada, nabavljeno je više stotina kancelarijskih stolica, 140 metalnih polica za arhivu zajedno sa kolicima za prevoz spisa vrijednosti oko 24.000 KM, sitnog inventara i slično. Također, u decembru 2025. godine izvršena nabavka 90 željeznih polica za potrebe novog prostora arhive u

Zetri u vrijednosti od 55.000 KM. Nadalje, **Projekat unapređenja izvršnog postupka** jedan je od kapitalnih projekata Općinskog suda u Sarajevu koji je doveo do značajnog smanjenja ukupnog broja komunalnih predmeta.

Općinski sud u Sarajevu se tokom 2022. godine suočio sa velikim izazovom koji se ogledao u enormnom broju neriješenih izvršnih predmeta, primarno pokrenutih od strane komunalnih preduzeća. Analiza stanja tada je pokazala da je Općinski sud u Sarajevu na početku 2022. godine imao **1.015.618 neriješenih izvršnih predmeta**, od čega su 999.841 činili takozvani komunalni predmeti. Navedeni problem, kao i konstantno povećanje broja ovih predmeta, zahtjevaio je hitnu reakciju te potrebu za multidisciplinarnim rješavanjem ovog problema.

Imenovanjem Damira Batotića za predsjednika Općinskog suda u Sarajevu u oktobru 2022. godine, a sa ciljem reakcije na tadašnje alarmantno stanje, formiran je tim sudskih izvršitelja na čelu sa Borisom Stojakovićem, koji je zahvaljuju-


ći vizionarskom pristupu i detaljno isplaniranoj strategiji predsjednika suda i članova tog tima, u kratkom periodu postigao značajan uspjeh u smanjenju zaostataka i enormnom povećanju naplate potraživanja.

U proteklom periodu sproveden je niz preventivnih mjera, uključujući sastanke s predstavnicima VSTV

BiH, Vlade KS i komunalnih preduzeća, s ciljem podsticanja aktivnijeg učešća u rješavanju dugovanja prije podnošenja prijedloga za izvršenje.



Sprovođenje strategije, usmjerene na smanjenje broja predmeta, uz istovremeno unapređenje naplate, dovelo je do niza konkretnih i mjerljivih rezultata u pogledu jačanja kapaciteta Odsjeka sudskih izvršitelja koje se ogledalo u povećanju broja istih te nabavci specijalizovanog kombi vozila za potrebe masovnih postupanja na terenu. Formiran je i jedinstveni „Call centar“ kao centar za podršku strankama u izvršnom postupku, a čime je naplata potraživanja u komunalnim predmetima na mjesečnom nivou povećana na impresivnih 80%.

U okviru projekta ICCEA III u sa-



radnji sa VSTV-om BiH i Vladom KS, Općinski sud u Sarajevu je prepoznat kao ključni faktor koji je svojim maksimalnim angažovanjem osigurao dalju provedbu i razvoj istog. Formiran je „Call centar“, obezbjeđen je prostor za prvi aukcijski centar u BiH te je u toku procedura nabavke namještaja i opreme za opremanje Aukcijskog centra. Riječ je o jedinstvenom projektu razvijenom po uzoru na švedske standarde i smjernice ICEA III projekta, u kojem Općinski sud u Sarajevu aktivno učestvuje dugi niz godina. Očekuje se da će ovaj Centar dovesti do dodatnog značajnog smanjenja broja izvršnih predmeta. U 2025. godini je izvršena nabavka kombi vozila za potrebe pomenutog projekta sa potrebnim kapacitetima za organizovano postupanje sudskih izvršitelja u punom kapacitetu na terenu, a što će za cilj imati intenzivniji rad po ovoj vrsti predmeta.

U okviru projekta ICCEA III koji se provodi u sudu preduzeto je niz mjera i aktivnosti u postupcima prinudnog izvršenja. Uspostavljeni su timovi izvršitelja koji rade na određenim rejonima, izvršitelji su dobili adekvatnu opremu za rad, napravljene su smjernice za postupanje u izvršnom postupku, obavljani sastanci sa predstavnicima KJKP u cilju iznalaženja adekvatnog prostora u svrhu aukcijskog centra te preduzete i druge aktivnosti u cilju veće efikasnosti izvršnog odjeljenja. Ovakve aktivnosti suda su prepoznate od strane predstavnika Švedske agencije za izvršenje SEA koji je nosilac projekta te predstavnika VSTV BIH koji su ovaj sud označili kao sud koji je ostvario najveći napredak kada je u pitanju povećanje efikasnosti izvršnog postupka što je i sam projekat učinilo



uspješnim. Od predstavnika KJKP smo dobili saznanja o daleko boljoj naplati potraživanja nakon uspostave „Call centra“.

Konačno, kvaliteta i inovativnost rada Općinskog suda u Sarajevu prepoznata je i od strane VSTV-a BiH koji je ovaj sud imenovao za mentorski sud za unapređenje izvršnog postupka na nivou Bosne i Hercegovine.

Ovakav pristup rezultirao je značajnim smanjenjem broja komunalnih predmeta te je izmijenjenim pristupom u radu, broj predmeta smanjen za 218.147 predmeta.

U narednom periodu planiran je nastavak primjene mjera koje su dale izuzetne rezultate u pogledu rješavanja predmeta. Navedeno prioritarno podrazumijeva očuvanje postignute ažurnosti i zadržavanje visokog stepena riješenih predmeta, sprečavanje stvaranja zaostataka kroz kontinuirano praćenje realizacije plana rješavanja predmeta. Poseban fokus je potrebno staviti na rješavanje najstarijih predmeta

uz tromjesečni monitoring u saradnji sa predsjednicima odjeljenja.

Nadalje, u cilju unapređenja rada i jačanja profesionalnih kapaciteta, sud je na inicijativu predsjednika suda, a zajedničkim angažmanom administrativnog osoblja **izradio Priručnik za stručno osposobljavanje administrativnog osoblja Općinskog suda u Sarajevu.** Priručnik je nastao je kao rezultat težnje da se novozaposlenim državnim službenicima i namještenicima približi i pojasni obavljanje radnih zadataka u ovom sudu, kao i da se svim zaposlenicima

omogući uvid u zadatke koje obavljaju pojedinačna odjeljenja s ciljem lakše rotacije uposlenika unutar odjeljenja administracije. Obzirom da je Afirmacija značaja stručnog usavršavanja u pravosudnoj zajednici jedan od ključnih strateških ciljeva Općinskog suda u Sarajevu, kontinuirano se provode aktivnosti na unapređenju edukativnih sadržaja i materijala. Etički kodeks Općinskog suda u Sarajevu, koji je sastavni dio ovog Priručnika, pruža jasne upute kod mnogih etičkih nedoumica i postupanje po odredbama ovog Kodeksa ima za cilj jačanje svijesti o ličnoj i profesionalnoj odgovornosti svih zaposlenika za zakonito, savjesno i efikasno izvršavanje službenih dužnosti.

Realizovane aktivnosti potvrđuju kontinuirani napor predsjednika Općinskog suda u Sarajevu da unaprijedi kvalitet usluga suda, povećava dostupnost pravde građanima, ojača transparentnost i osigura moderno i efikasno pravosuđe u službi javnog interesa. Navedeno predstavlja čvrstu osnovu za realizaciju planiranih aktivnosti i u narednom periodu. ■

I u 2026. godini nastavlja se uspješna saradnja Općinskog suda u Sarajevu sa CEST-om FBiH

Sastanak sa direktorom CEST-a FBiH, g. Almirom Tabakovićem, održan je u biblioteci suda 16. januara 2026. godine. Obzirom da je prepoznat nedostatak adekvatne edukacije za administrativno osoblje koje je neodvojivi dio pravosudnog sistema, na sastanku su razmatrane mogućnosti organizovanja obuka za državne službenike i namještenike. Poseban akcenat stavljen je na edukaciju zak referenata, sudskih izvršitelja te IKS referenata. S tim u vezi, direktor CEST-a FBiH je ovu inicijativu ocijenio kao veoma dobru i izrazio spremnost da



se pronađu konkretni načini za realizaciju.

Direktor Tabaković najavio je novitete u pogledu specijalističkih i općih obuka u 2026. godini te se dotakao obavezne obuke za novo-

menovane sudije i stručne saradnike u narednom periodu.

Na sastanku je konstatovano da je u protekloj godini Općinski sud u Sarajevu sa CEST-om FBiH imao odličnu saradnju. ■

Održan radni sastanak predsjednika Kantonalnog i Općinskog suda u Sarajevu

U okviru redovnih aktivnosti propisanih Pravilnikom o unutrašnjem sudskom poslovanju, predsjednica Kantonalnog suda u Sarajevu, Jasenka Potogija, posjetila je 29. decembra 2025. godine Općinski sud u Sarajevu. Na radnom sastanku s

predsjednikom suda, Damirom Batotićem, razmatrani su ključni rezultati rada i ispunjenost strateških ciljeva tokom tekuće godine.

Glavne teme sastanka bile su usmjerene na analizu rada sarajevskog Općinskog suda u drugoj po-

lovini 2025. godine. Poseban fokus stavljen je na realizaciju Plana rješavanja predmeta - analizirana je brzina i efikasnost rješavanja sudskih postupaka, statistički izvještaj kvaliteta sudskih odluka, te druga aktualna pitanja značajna za zakonito i pravilno funkcionisanje oba suda. Predsjednik Batotić je poseban akcenat stavio na analizu ukupnih rezultata rada suda prema kojima je sud u periodu 01.01.2022. godine do 25.12.2025. godine zaprimio 747.078 predmeta, a u istom periodu riješio 952.980 predmeta, čime je u potpunosti savladan priliv te za navedeni period smanjen zaostatak za 205.902 predmeta.

Tokom 2025. godine predsjednica Kantonalnog suda u Sarajevu je bila dva puta u radnoj posjeti Općinskom sudu u Sarajevu. ■



Uspješna saradnja Općinskog suda u Sarajevu i Notarske komore FBiH u 2025. godini

Redovni godišnji sastanak predsjednika Općinskog suda u Sarajevu, Damira Batotića, sa predstavnicima Notarske komore Federacije BiH održan je 14. januara 2026. godine u prostorijama Suda.

Sastanak je organizovan s ciljem analize rada notara u 2025. godini, razmatranja eventualnih izazova u praksi te unapređenja postojeće saradnje između ove dvije institucije. Tokom sastanka razgovarano je o aktuelnim temama od zajedničkog interesa za Sud i Notarsku komoru FBiH, s posebnim akcentom na jačanje međuinstitucionalne saradnje i unapređenje pristupa notara Sudu. Učesnici su razmijenili mišljenja o dosadašnjoj praksi, identifikovali



određene izazove u radu te izrazili spremnost za intenziviranje komunikacije i češće održavanje sastana-

ka, s ciljem unapređenja efikasnosti u zajedničkim poslovima. ■

Uz podršku Ministarstva pravde i uprave KS obezbjeđena sredstva za opremanje prostora nekadašnjeg KPZ-a „Miljacka“ te Aukcijskog centra

Uz finansijsku podršku Ministarstva pravde i uprave Kantona Sarajevo, na čelu s ministricom Darjom Softić Kadenić, Općinski sud u Sarajevu pokrenuo je postupak nabavke kancelarijskog namještaja, u vrijednosti od 100.000 KM, s ciljem opremanja prostorija nekadašnjeg Kazneno-popravnog zavoda „Miljacka“. Po završetku rekonstrukcije KPZ-a, a koju finansira EU ukupne vrijednosti od 3,7 miliona Eura, prostorije će biti preuređene u nove moderne kancelarije za sudije, ali će biti otvorene i kancelarije suda za pružanje informacija strankama te uspostavljen adekvatniji raspored pisarnica u okviru Odsjeka za upravljanje predmetima.

U konkretnom slučaju radi se o najvećem i kapitalnom ulaganju u infrastrukturu pravosudnih institucija u Kantonu Sarajevo nakon posljednje rekonstrukcije Palate pravde 2009. godine. Istovremeno, uz podršku Ministarstva pravde i uprave KS započet je i proces opremanja Aukcijskog centra, uključujući nabavku namještaja, računarske opreme i audiovizuelne opreme potrebne za njegov rad, u vrijednosti od 120.000 KM. U konkretnom slučaju radi se o jednoj od aktivnosti iz usvojenog Akcionog plana mjera i aktivnosti za unaprijeđenje naplate komunalnih usluga u Kantonu Sarajevo shodno Zaključku Vlade Kantona Sarajevo



od 17.08.2023. godine.

Aukcijski centar će omogućiti skladištenje pokretnih stvari oduzetih u izvršnom postupku radi naplate dugovanja fizičkih i pravnih lica, kao i njihovu prodaju putem javnog nadmetanja. Građani i pravna lica imat će mogućnost razgledanja oduzetih pokretnih stvari u Centru i učešća u aukcijama. ■



U okviru edukacije posvećene praktičnoj primjeni Zakona o oduzimanju nezakonito stečene imovine potpisan sporazum sa Općinskim sudom u Sarajevu

Federalna agencija za upravljanje oduzetom imovinom, u saradnji sa Centrom za edukaciju sudija i tužilaca Federacije BiH, organizovala je stručnu edukaciju pod nazivom „Izazovi primjene Zakona o oduzimanju nezakonito stečene imovine krivičnim djelom“, koja je održana od 17. do 19. decembra 2025. godine u Neumu.

Edukacija je okupila tužioce, sudije, policijske službenike i predstavnike drugih institucija uključenih u finansijske istrage, s ciljem unapređenja znanja, razmjene iskustava i jačanja međuinstitucionalne koordinacije u postupcima finansijskih istraga i oduzimanja nezakonito stečene imovine. Poseban naglasak stavljen je na praktične izazove s kojima se institucije susreću u primjeni Zakona, uključujući identifikaciju imovinske koristi, dono-

šenje privremenih mjera osiguranja i provođenje složenih finansijskih istraga.

Kroz konkretne primjere iz tužilačke i sudske prakse, edukatori su predstavili ključne segmente postupanja – od provođenja finansijskih istraga i primjene mjera osiguranja, do postupka odlučivanja po prijedlozima za oduzimanje imovinske koristi. Razmatrani su stavovi i zaključci Vrhovnog suda Federacije BiH, odluke prvostepenih sudova te praktične dileme i izazovi u dosljednoj primjeni Zakona.

Na samom kraju, istaknuto je da efikasno oduzimanje nezakonite imovine predstavlja jedan od najvažnijih instrumenata borbe protiv kriminala i ključni element izgradnje povjerenja građana u pravosudni sistem. Učesnici su naglasili da stečena praktična znanja i razmije-

njena iskustva značajno doprinose unapređenju primjene Zakona i boljoj zaštiti imovinskih interesa države i građana.


U okviru završnih aktivnosti upriličeno je i potpisivanje Sporazuma o međusobnoj saradnji između Federalne agencije za upravljanje oduzetom imovinom i Općinskog suda u Sarajevu, koji su potpisali direktor Agencije Emir Bašić i predsjednik suda Damir Batotić.

Zaključivanjem ovog dokumenta Općinski sud u Sarajevu i Federalna agencija za upravljanje oduzetom imovinom potvrđuju svoju posvećenost jačanju vladavine prava, te unapređenju saradnje i koordinacije između pravosudnih i drugih nadležnih institucija u borbi protiv korupcije i organizovanog kriminala u Federaciji Bosne i Hercegovine. ■

Direktor Švedske agencije za izvršenje (SEA) i predstavnik Ambasade Kraljevine Švedske u BiH posjetili Općinski sud u Sarajevu

U okviru ICEA III projekta 10. decembra 2025. godine Općinski sud u Sarajevu posjetila je delegacija Kraljevine Švedske koju je predvodio gospodin Fredrik Rosengren, generalni direktor Švedske agencije za izvršenje. Tom prilikom je u biblioteci suda održan sastanak kojemu su, osim predstavnika Općinskog suda u Sarajevu, prisustvovali i predstavnici Visokog sudskog i tužilačkog vijeća BiH.

U svom uvodnom obraćanju Damir Batotić, predsjednik Općinskog suda u Sarajevu, informisao je prisutne o projektima ovog suda koji su do sada uspješno realizovani, sa ciljem unapređenja izvršnog postupka i povećanja naplate u izvršnim predmetima pokrenutim pred ovim sudom. Predsjednik se ukratko osvrnuo i na aktivnosti koje su implementirane u okviru ICEA III projekta, na reorganizaciju poslovnih procesa te unapređenje rada Izvršnog odjeljenja suda, a istaknuta je i potreba za dodatnom podrškom SEA u svrhu realizacije planiranih



aktivnosti ovog suda.

Tokom posjete sudu delegacija Kraljevine Švedske, kao i predstavnici VSTV-a BiH, obišli su sudski „Call centar“ gdje im je praktično prikazan način rada sudskih izvršitelja. Također, imali su priliku posjetiti i prostor namijenjen za potrebe Aukcijskog centra, čije opremanje je u toku. Tom prilikom je direktor Rosengren izjavio da je impresivno kako je za kratko vrijeme ovaj sud ostvario nevjerovatan uspjeh, naročito po pitanju izvršnog postupka,

te se u narednom periodu očekuje nastavak saradnje u okviru koje bi i kolege iz Švedske mogle preuzeti neka pozitivna iskustva Općinskog suda u Sarajevu.

Navedena posjeta je realizovana u okviru projekta „Unapređenje efikasnosti sudova i odgovornosti sudija i tužitelja u BiH“ (ICEA III), koji Visoko sudsko i tužilačko vijeće BiH provodi u saradnji sa Švedskom agencijom za izvršenje, a uz finansijsku podršku Kraljevine Švedske. ■



Sudije Parničnog odjeljenja u protekle tri godine riješile čak 21.398 parničnih predmeta

Analizom rezultata rada sudija Parničnog odjeljenja Općinskog suda u Sarajevu u protekle tri godine, utvrđeno je da je od 01.01.2022. do 30.09.2025. godine zaprimljeno 18.349 „čistih“ parničnih predmeta, a riješeno čak 21.398. Navedeno je rezultat maksimalnog zalaganja svih sudija Parničnog odjeljenja, kao i menadžmenta suda.

Također je bitno istaći da je tokom dvodnevne konferencije u oktobru 2025. godine, održanoj u Splitu, predstavljen Finalni izvještaj Radne grupe za upravljanje sudovima (WGJM) u okviru projekta Judicial Reform Programme for the Western Balkans. Na konferenciji su prezentirani rezultati statističke obrade podataka zemalja zapadnog Balkana



▲ Sutkinja Amra Hedžić Hadžić, predsjednica Parničnog odjeljenja

sa posebnim akcentom na dužinu trajanja parničnih postupaka po više parametara, a na temelju nasumičnog odabira predmeta riješenih tokom 2023. godine. Kada je riječ o Bosni i Hercegovini, provedena

analiza parničnih predmeta Općinskog suda u Sarajevu pokazala je da Parnično odjeljenje ovog suda ima daleko najkraće roкове postupanja po parničnim predmetima u odnosu na sve druge sudove u regiji. ■

Radni sastanak predsjednika općinskih sudova u Goraždu i Sarajevu

U Općinskom sudu u Goraždu održan je radni sastanak predsjednice Suda Lejle Ferhatović i predsjednika Privrednog odjeljenja Murisa Tatarina sa predsjednikom Općinskog suda u Sarajevu Damirrom Batotićem i predsjednikom Privrednog odjeljenja Nebojšom Joksimovićem.

Ova posjeta je nastavak saradnje i aktivnosti na nivou sudova koja ima za cilj unapređenje rada i efikasnosti sudskih postupaka, kroz razmjenu iskustava i primjera dobre prakse između ove dvije pravosudne institucije.

Tokom sastanka razmijenjena su iskustva i primjeri dobre prakse u radu ova dva suda, sa posebnim akcentom na postupanje u privrednim predmetima i primjenu novog Zakona o stečaju u Federaciji BiH. Istaknut je značaj kontinuiranog stručnog usavršavanja sudija i ostalog administrativnog osoblja, ali i međuinstitucionalne saradnje, kako bi se poboljšao



status zaposlenih u sudovima i uspostavila jedinstvena i efikasna sudska praksa kako u privrednoj tako i u drugim pravnim oblastima.

Na kraju, dogovoren je nastavak saradnje između ova dva suda kao i da se u narednom periodu nastavi sa održavanjem ovakvih sastanaka i iz drugih pravnih oblasti što za konačni cilj ima unapređenje kvaliteta sudskih postupaka koji se vode pred ovim sudovima. ■



Održan sastanak na temu nastavka postupka harmonizacije



U cilju što efikasnijeg nastavka postupka harmonizacije u Kantonu Sarajevo, 7. oktobra 2025. godine u prostorijama Općinskog suda u Sarajevu održan je sastanak predsjednika Suda Damira Batotića i direktora Federalne uprave za geodetske i imovinsko-pravne poslove Željka Obradovića.

Tokom sastanka predsjednik Batotić upoznao je prisutne s radom Zemljišnoknjižnog ureda te je razgovarano o daljim aktivnostima

na provođenju postupka harmonizacije. Posebna pažnja posvećena je izazovima s kojima se Zemljišnoknjižni ured susretao u postupanju po predmetima harmonizacije, kao i mogućnostima i podršci Federalne uprave za geodetske i imovinsko-pravne poslove za njihovo prevazilaženje. Direktor Obradović istakao je da je Općinski sud u Sarajevu najbolji primjer ažurnosti i efikasnosti kada je u pitanju ovakva vrsta predmeta.

Tokom sastanka dogovoreno je koje će općine u Kantonu Sarajevo biti obuhvaćene postupkom harmonizacije te je zaključeno da će se u narednom periodu održati sastanak sa nadležnim rukovodstvom općina, a radi preciziranja daljnjih aktivnosti. ■

Nastavlja se postupak harmonizacije na području Općine Ilidža

Nermin Muzur, načelnik Općine Ilidža, sastao se 06. novembra 2025. godine sa Damirom Batotićem, predsjednikom Općinskog suda u Sarajevu, kojom prilikom je održan sastanak u prostorijama suda, a na temu nastavka postupka harmonizacije u Općini Ilidža.

Tokom sastanka je razmotreno šta je potrebno za uspješno provođenja postupka harmonizacije te je postignut dogovor o katastarskim općinama Ilidže koje će biti obuhvaćene u narednoj fazi procesa harmonizacije, dok je process harmonizacije za katastarsku općinu Vlakovo završen.

Iz Općine Ilidža su posebno naglasili da su oni jedina općina u Kantonu Sarajevo koja je uradila potpunu obnovu premjera, počev od avionskog snimanja do izlaganja dobivenih podataka te da će zahvaljujući ovim



podacima, a u saradnji sa ZK uredom, proces harmonizacije podataka biti značajno olakšan. Općina Ilidža izrazila je spremnost na dalju saradnju i pružanje sve potrebne podrške u cilju što uspješnijeg provođenja ovog postupka. ■



Za protekle tri godine Općinski sud u Sarajevu riješio 918.323 predmeta

U biblioteci Općinskog suda u Sarajevu 31. oktobra 2025. godine održan je Kolegij predsjednika sudskih odjeljenja na kojem je, između ostalog, predstavljen devetomjesečni izvještaj o radu sudskih odjeljenja, a prisutni su imali priliku informisati se o većem broju aktivnosti koje su realizovane u prethodnom periodu kao i onim koje se trenutno realizuju u sudu uključujući radove na rekonstrukciji i poboljšanju sigurnosti u zgradi, izmještanju arhive te nabavci informatičke opreme. Predsjednik suda Damir Batotić je, između ostalog, informisao prisutne da je trenutno za potrebe efikasnijeg rada suda u izradi i Priručnik za edukaciju sudske administracije te Pravilnik o mentorisanju za sudske asistente i upisničare, a koji imaju za cilj da pruže sveobuhvatan okvir za usavršavanje zaposlenika sudske ad-

ministracije te da je ovo prvi slučaj u kojem sud samostalno preuzima inicijativu za izradu i provedbu programa edukacija sudske administracije.

Predsjednik Batotić je poseban akcenat stavio na analizu ukupnih rezultata rada suda prema kojima je sud u periodu od 2022. do 29.10.2025. godine, shodno statističkim pokazateljima, zaprimio 733.708 predmeta te je u istom periodu od strane nosilaca pravosudnih funkcija riješeno 918.323 predmeta, čime je u potpunosti savladan priliv te smanjen zaostatak za 184.615 predmeta. Pored navedenog, sud je u istom izvještajnom periodu u Zemljišnoknjižnom uredu zaprimio i završio 142.821 predmet harmonizacije.

Značajno je naglasiti i povećanu učinkovitost Odsjeka sudskih izvršitelja nakon prelaska na novi

sistem rada i postupanja po komunalnim predmetima. Komparacijom rezultata rada iz avgusta 2024. i 2025. godine, utvrđeno je da je učinkovitost rada sudskih izvršitelja na terenu sa 7% porasla na 80%, dok učinkovitost rada putem „Call centra“ iznosi čak 88%.

Predsjednik je istakao da su navedeni rezultati zasluga svih zaposlenika suda. Naglasio je i važnost smanjenja broja starih predmeta te obavijestio Kolegij da će se u narednom periodu vršiti poseban nadzor nad radom sudija i stručnih saradnika u ovim predmetima.

Nakon predstavljenih rezultata rada, zaključak Kolegija je da se i u narednom periodu nastavi sa radom na kontinuiranom smanjenju broja neriješenih predmeta, ažurnosti u radu te pružanju kvalitetnih usluga prema korisnicima. ■

Održan sastanak sa resornim ministrima

U prostorijama Općinskog suda u Sarajevu 27. oktobra 2025. godine predstavljeni su rezultati aktivnosti koje zajednički provode Odsjek sudskih izvršitelja i komunalna preduzeća s ciljem unapređenja naplate neplaćenih komunalnih usluga.

Na sastanku su prisustvovali Damir Batotić, predsjednik Općinskog suda u Sarajevu, Darja Softić Kadenić, ministrica pravde i uprave Kantona Sarajevo, Afan Kalamujić, ministar finansija KS te Mladen Pandurević, ministar komunalne privrede, infrastrukture, prostornog uređenja, građenja i zaštite okoliša Kantona Sarajevo.

Tokom sastanka predstavljen je rad „Call centra“ Općinskog suda u Sarajevu, koji se pokazao kao izuzetno efikasan alat u postupcima naplate. Istaknuto je i da se razmatra osnivanje korisničkog centra za podršku građanima, a koji bi bio smješten u blizini zgrade suda, kako bi se građanima omogućio lakši pristup informacijama o radu i uslugama komunalnih preduzeća.

Učesnici sastanka informisani su i o aktivnostima na uspostavi Aukcij-



skog centra, kao i o uslovima potrebnim za početak njegovog rada.

Ministri su izrazili zadovoljstvo postignutim rezultatima Općinskog suda u Sarajevu kada je riječ o komunalnim predmetima, te istakli spremnost Vlade Kantona Sarajevo da i dalje pruža podršku razvoju ovih procesa.


Sastanak predsjednika Batotića sa Nihadom

Ukom, premijerom Kantona Sarajevo, Darjom Softić-Kadenić, ministricom pravde i uprave KS te

Afanom Kalamujićem, ministrom finansija Kantona Sarajevo održan je u Kabinetu predsjednika 15. jula 2025. godine. Tom prilikom je predsjednik suda predstavio aktivnosti usmjerene na unapređenje naplate potraživanja u komunalnim predmetima, a prisutnima su prezentovani i rezultati rada Općinskog suda u Sarajevu u pogledu napretka kada je riječ o naplati u izvršnim predmetima te su pobrojana jedinstvena inovativna rješenja koja su do sada implementirana na sudu, a sve u pogledu efikasnijeg i bržeg rješavanja izvršnih predmeta.

Također, tokom posjete sudu predsjednik Batotić je informisao premijera i ministre o ostvarenim unapređenjima i u drugim segmentima funkcionisanja suda kao i o aktivnostima koje su usmjerene ka olakšanom pristupu stranaka sudu, a o čemu su se ministri i premijer mogli uvjeriti tokom posjete, te im se zahvalio na podršci koju su u tom smislu pružili sudu.

Predstavnici Vlade Kantona Sarajevo ocijenili su dosadašnje rezultate rada suda kao izuzetno pozitivne, ističući da je riječ o zasigurno najvećem napretku u posljednjih trideset godina. ■



Jačanje saradnje sarajevskog Općinskog suda i MUP-a KS

Jačanje međusobne saradnje i rješavanje problema u radu bile su glavne teme sastanka Damira Batotića, predsjednika Općinskog suda u Sarajevu, i Admira Katicice, ministra unutrašnjih poslova Kantona Sarajevo, održanog 10. oktobra 2025. godine u Kabinetu predsjednika Suda.

Jedna od tema razgovora je bio veliki priliv prekršajnih predmeta koje Općinski sud u Sarajevu zaprima od MUP-a KS u posljednje dvije godine. Ministar Katica informisao je predsjednika Batotića o aktivnostima koje MUP KS poduzima s ciljem prevazilaženja ovog problema, posebno naglašavajući



znatno povećan broj zaposlenika u MUP-u KS koji rade na rješavanju ovih predmeta. Ministar je naglasio važnost ovakvih sastanaka koji omogućavaju razmjenu mišljenja i doprinose boljem razumijevanju i

saradnji.

Sastanak je završen uz obostranu spremnost na intenzivniju koordinaciju i zajedničko djelovanje u cilju ostvarivanja planiranih rezultata. ■



Grupa pripravnika iz Njemačke u posjeti sarajevskom Općinskom sudu

Grupa pripravnika iz Minhena (SR Njemačka) posjetila je 10. oktobra 2025. godine Općinski sud u Sarajevu u sklopu praktične obuke i priprema za polaganje konačnog ispita na Visokom Regionalnom sudu u Minhenu.

Pripravnike su dočekali Senada Smajiš, sekretarka suda te Kenad Osmanović, sudija Privrednog odjeljenja.

U uvodnom obraćanju sekretarka Smajiš upozнала je goste s organizacijom rada i strukturom suda, naglasivši da je Općinski sud u Sarajevu jedan od najvećih u regiji, što iziskuje složenu organizaciju i koordinaciju svakodnevnih aktivnosti. Sudija Osmanović detaljnije je govorio o nadležnostima suda, proceduri imenovanja sudija i funkcionisanju pravosuđa na državnom i

entitetskim nivoima. Nakon izlaganja uslijedila su brojna pitanja, na koja je sudija odgovorio, pružajući pripravnici dodatni uvid u pravni sistem Bosne i Hercegovine. Na kraju posjete, njemački pripravnici upoznali su se s historijatom zgrade u kojoj je smješten Općinski sud te obišli jednu od sudnica, gdje su imali priliku vidjeti kako izgleda radno okruženje bh. sudova. ■

Studenti Pravnog fakulteta obavljat će praksu na sarajevskom Općinskom sudu

S ciljem jačanja praktičnih vještina te povezivanja teorijskog znanja sa pravnom praksom, Pravni fakultet Univerziteta u Sarajevu još od 2021. godine realizuje program obavljanja studentskih praksi u saradnji sa pravosudnim institucijama i advokatskim kancelarijama.

U akademskoj 2025. godini studenti četvrte godine pravnog fakulteta Univerziteta u Sarajevu će imati priliku da provedu 15 sati direktnog mentorskog rada, jedan na jedan, sa sudijama Općinskog suda u Sarajevu. Studenti će studentsku praksu obavljati na Krivičnom, Parničnom i Prekršajnom odjeljenju suda.

Inače, Općinski sud u Sarajevu potpisao je u martu 2021. godine Okvirni sporazum o razumijevanju za unapređenje praktične nastave i obuke studenata prava i diplomiranih pravnika. Cilj Sporazuma



je unaprijediti saradnju pravnih fakulteta i pravosudnih institucija/profesionalnih udruženja nosilaca pravosudnih funkcija, advokature i centara za edukaciju sudija i tužila-

ca u realizaciji praktične nastave za studente prava i praktičnog osposobljavanja diplomiranih pravnika, a kako bi stekli ili unaprijedili praktična znanja i vještine. ■

Nastavak aktivnosti na unapređenju krivičnog postupka

Ostvareni rezultati dosadašnjeg aktivnog provođenja mjera na unapređenju efikasnosti i kvaliteta krivičnih postupaka u sudovima bili su u fokusu sastanaka predstavnika Visokog sudskog i tužilačkog vijeća Bosne i Hercegovine sa pravosudnim institucijama Zeničko-dobojskog kantona i Kantona Sarajevo, koji su održani u septembru 2025. godine.

Kako je tokom sastanaka zaključeno, primjetni su određeni pomaci u korištenju mjera za unapređenje procesne discipline, koncentraciji dokaza i nastojanju da ih se što više izvede na jednom ročištu za glavni pretres koji duže traje, a što u konačnici rezultira i pomacima u procesuiranju krivičnih predmeta u sudovima iz ovih regija.

Najviše se govorilo o aktivnostima koje se realizuju s ciljem unapređenja procesne discipline i koncentracije dokaza, kao važnim segmentima poboljšanja



cjelokupnog krivičnog postupka.

Aktivnosti koje su primarno usmjerene na poboljšanje kvaliteta rada krivičnih odjela sudova, kao i efikasnosti krivičnih postupaka kroz jačanje timskog rada, uspostavljanje kriterija i standarda kvalitete za krivične odjele, unapređenje procesne discipline u vođenju krivičnih postupaka kao i uspostavljanje profesionalnog dijaloga između krivičnih odjela prvostepenih i drugostepenih sudova, realizuju se u okviru projekta Jačanje kapaciteta pravosuđa koji VSTV BiH implementira uz podršku Norveške. ■

Održan sastanak rukovodstva pravosudnih institucija Kantona Sarajevo

Sa ciljem jačanja institucionalne saradnje pravosudnih institucija Kantona Sarajevo, u prostorijama Općinskog suda u Sarajevu je 09. septembra 2025. godine održan radni sastanak rukovodilaca Općinskog suda u Sarajevu, Kantonalnog suda u Sarajevu te Kantonalnog tužilaštva Kantona Sarajevo. Sastanak je organizovan kao nastavak međuinstitucionalne saradnje koja je započela 2023. godine potpisivanjem Memoranduma o razumijevanju između sarajevskog Općinskog i Kantonalnog suda te Kantonalnog tužilaštva KS. Tokom sastanka se razgovarano o različitim temama koje su od zajed-



ničkog interesa za ove pravosudne institucije i izazovima sa kojima se iste susreću u svakodnevnom radu, sa posebnim akcentom na efikasnije upravljanje krivičnim postupcima.

Tokom sastanka određena je i dinamika kojom će se u narednom periodu organizovati sastanci između predstavnika ovih institucija. ■

Održan zajednički sastanak predsjednika općinskog suda u Sarajevu i Travniku sa federalnim ministrom pravde

Radni sastanak predsjednika Općinskog suda u Sarajevu Damira Batotića sa federalnim ministrom pravde Vedranom Škobićem, predsjednikom Općinskog suda u Travniku Goranom Dujićem te njihovim saradnicima, održan je u Palati pravde 02. septembra 2025. godine. Predsjednik Batotić informisao je prisutne o trenutnim aktivnostima koje se provode u ovom sudu, a raspravljano je i o nizu drugih pitanja od zajedničkog interesa za građane i institucije.

Učesnici sastanka su se usaglasili da je važno nastaviti započeti dijalog te dogovorili da će u narednom periodu biti organizovani novi sastanci s ciljem konkretizacije današnjih prijedloga te što brže realizacije dogovorenih aktivnosti. ■





Uspješno realizovan sastanak sa predstavnicima Ureda za borbu protiv korupcije i upravljanje kvalitetom

U prostorijama Općinskog suda u Sarajevu 28. avgusta 2025. godine održan je sastanak Damira Batotića, predsjednika suda te Erduana Kafedžića, šefa Ureda za borbu

protiv korupcije i upravljanje kvalitetom. Sastanak je održan na inicijativu Ureda, a tokom sastanka su razmotrene mogućnosti jačanja institucionalne saradnje, s posebnim

naglaskom na razmjenu informacija, iskustava i realizaciju zajedničkih aktivnosti koje imaju za cilj unapređenje transparentnosti, integriteta i efikasnosti rada, kao i zajedničkog djelovanja u borbi protiv korupcije.

Nakon konstruktivnog dijaloga, a u cilju formalizacije i daljeg razvoja partnerskog odnosa, dogovoreno je potpisivanje Sporazuma o saradnji između Ureda za borbu protiv korupcije i upravljanje kvalitetom Kantona Sarajevo i Općinskog suda u Sarajevu.

Zaključeno je da će potpisivanje ovog Sporazuma predstavljati značajan korak ka jačanju međusobne saradnje i koordinacije ove dvije institucije te doprinijeti ostvarivanju zajedničkih ciljeva u interesu građana Kantona Sarajevo. ■



Na nivou Bosne i Hercegovine Općinski sud u Sarajevu imenovan za mentorski sud za unapređenje izvršnog postupka



Sastanak predstavnika Općinskog suda u Sarajevu, Švedske agencije za izvršenje – SEA, Visokog sudskog i tužilačkog vijeća BiH te pomoćnika ministra komunalne privrede, infrastrukture, prostornog uređenja, građenja i zaštite okoliša Kantona Sarajevo, održan je u biblioteci suda 02. jula 2025. godine. Tom prilikom prezentovani su rezultati rada Općinskog suda u Sarajevu u pogledu napretka u rješavanju i naplati u izvršnim predmetima te su predstavljena jedinstvena inovativna rješenja koja su do sada implementirana, a sve u pogledu efikasnijeg i bržeg rješavanja izvršnih predmeta. Također je predstavljen i model novog pristupa strankama kroz projekte osnivanja Centra za podršku strankama (Call centar) kao i planiranog Aukcijskog centra za prodaju zaplijenjenih pokretnih stvari u izvršnim postupcima.

Na sastanku su najavljena i buduća tehnička rješenja za brži proces i efikasniju naplatu u komunalnim predmetima (elektronske uplatnice



i jedinstvena uplata putem QR kodova).

Tokom obraćanja prisutnima, Damir Batotić, predsjednik Općinskog suda u Sarajevu, naglasio je da je Projekat unapređenja izvršnog postupka jedan od kapitalnih projekata Općinskog suda u Sarajevu koji je doveo do značajnog smanjenja ukupnog broja komunalnih predmeta. Predsjednik se ujedno zahvalio svim prisutnim predstavnicima zakonodavne i izvršne vlasti te predstavnicima Švedske agencije

za izvršenja-SEA koja je prepoznala napore menadžmenta suda uložene u realizaciju ovog Projekta kao i postignute rezultate koji se odnose na značajno smanjenje broja komunalnih predmeta u odnosu na prethodne godine, sa fokusom na efikasniju naplatu potraživanja.

Općinski sud u Sarajevu je na ovom sastanku zvanično imenovan za mentorski sud na nivou Bosne i Hercegovine za unapređenje Izvršnog postupka. ■





Posjete Općinskom sudu u Mostaru i Sarajevu – Razgovori o održivosti inoviranog načina rada

Održivost reorganizovanih poslovnih procesa u sudovima ostaje u fokusu Visokog sudskog i tužilačkog vijeća Bosne i Hercegovine (VSTV BiH) i Sudske administracije Švedske, obzirom da je riječ o novim modelima rada koji su dali vidljive rezultate.

Reorganizacija poslovnih procesa je uspješno realizovana u 18 prvostepenih sudova, a na temelju stečenih iskustava planira se njeno proširenje na sve sudove u Bosni i Hercegovini.

Kako pokazuju postignuti rezultati, reorganizacija je doprinijela bržem rješavanju predmeta, efikasnijoj internoj komunikaciji i boljoj raspodjeli resursa. Također, novi modeli rada značajno rastereduju sudije od administrativnih poslova i omogućavaju im da svoj primarni posao, sudovanje, rade kvalitetnije i efikasnije.

Ovaj metod u konačnici omogućava optimalno korištenje resursa suda, stvarajući okruženje koje podržava brže i efikasnije donošenje sudskih odluka. Obzirom da je riječ o značajnim po-

macima, u fokusu VSTV BiH i partnera iz Švedske jeste osigurati njihovu održivost i dalji progres. S tim ciljem organizovane su i radne posjete sudovima koji primjenjuju inovirane modele rada, i to Općinskom sudu u Mostaru i Općinskom sudu u Sarajevu. Posebno se govorilo o izazovima koji se pojavljuju u svakodnevnom radu, kao i potrebi za kontinuiranom podrškom i jačanjem kapaciteta za dalji razvoj sistema.

Proces reorganizacije poslovnih procesa dio je napora da se pravosuđe učini efikasnijim, transparentnijim i usmjerenim ka pružanju kvalitetnijih usluga građanima. Tokom posjeta razgovarano je o postignutim rezultatima, iskustvima iz prakse, te tehničkim i organizacijskim aspektima održavanja postignutih standarda.

Ove posjete predstavljaju nastavak aktivnosti u okviru projekta ICEA III – Unapređenje efikasnosti pravosuđa u BiH, koji provodi VSTV BiH uz podršku Švedske sudske administracije, a finansira Kraljevina Švedska. ■



Ambasador Soreca, premijer Uk i ministrica Softić Kadenić obišli radove na rekonstrukciji Palate pravde

Šef Delegacije Evropske unije u Bosni i Hercegovini Luigi Soreca, premijer Kantona Sarajevo Nihad Uk i ministrica pravde i uprave KS Darja Softić Kadenić posjetili su danas Palatu pravde i radove koje finansira EU. Kako je istaknuto tokom obilaska radova, EU osigurala sredstva za renoviranje Kantonalnog i Općinskog suda u Sarajevu. Riječ je o prvom kapitalnom ulaganju u infrastrukturu pravosudnih institucija u KS nakon 2009. godine. Ambasador Soreca naglasio je da je Evropa ovdje i nastavlja finansirati brojne projekte koji poboljšavaju kvalitetu života građana BiH.

“Vladavina prava i pristup pravdi središnji su prioriteti EU u BiH. Diljem zemlje ulažemo u moderne pravosudne objekte koji bolje služe potrebama građana i onih koji rade u pravosudnim institucijama. Drago mi je da izgradnja dobro napreduje i ponosan sam što je EU bila u mogućnosti osigurati 3,7 miliona eura za renoviranje Kantonalnog i Općinskog suda u Sarajevu”, rekao je Soreca.

Premijer Uk je rekao da pravosuđe mora imati uslove da radi brzo, efi-



kasno i neovisno.

“Nakon što smo uspjeli izmjestiti zatvorske jedinice koje su decenijama, potpuno neprihvatljivo, bile smještene u samom centru grada, otvorili smo prostor za dugo očekivane promjene rekonstrukcije i proširenja zgrade Općinskog i Kantonalnog suda. Na raspolaganju ćemo imati dodatnih 3.000 kvadratnih metara funkcionalnog, savremenog prostora. Građevinski radovi bit će završeni do jeseni, a useljenje očekujemo već naredne godine. Radovi koji su u toku predstavljaju konkretno ulaganje u jačanje institucija ključnih za pravdu i bor-

bu protiv korupcije. Kao premijeru KS, posebno mi je važno da pošaljemo jasnu poruku: jačamo one koji prvi reaguju, koji štite zakon, i koji rade u interesu građana. Zahvaljujem našim partnerima iz Delegacije Evropske unije, koji su prepoznali ne samo važnost ovog projekta, već i širu sliku – posvećenost koju Kanton Sarajevo ulaže u stvaranje uređenijeg, pravednijeg i funkcionalnijeg društva”, rekao je premijer Uk. Ministrica Softić Kadenić je istakla da su uslovi za rad vrlo bitna pretpostavka za kvalitetno obavljanje posla i dodala: “U toku je unutrašnja adaptacija i prenamjena bivših zatvorskih prostorija u nove moderne kancelarije i prostorije za sastanke sudija. U jednom djelu će biti smještene jedinice sudske policije, što će generalno doprinijeti funkcioniranju suda, sudskih postupaka, sigurnosti svih učesnika, od građana do onih koji sudjeluju u samim postupcima. S obzirom na to da se radi o zgradi koja je nacionalni spomenik, Vlada KS je dala u izradu projekt sanacije kompletne fasade, čime ćemo nadam se u skorije vrijeme dobiti i vanjsko uređenje ovog važnog objekta”. ■





Uspješno realizovan sastanak sa predstavnicima komunalnih javnih preduzeća



U prostorijama Općinskog suda u Sarajevu održan je zajednički sastanak sa predstavnicima komunalnih preduzeća u Kantonu Sarajevu, a na temu efikasnije naplate potraživanja u predmetima koji su pokrenuti pred ovim sudom na ime neplaćenih komunalnih usluga.

Na sastanku su prezentovani svi dosadašnji projekti koje je Općinski sud u Sarajevu realizovao prema Akcionom planu Vlade KS, a koji za cilj imaju pružanje podrške građanima za efikasnije i brže izmirenje dugovanja za neplaćene komunalne usluge. Prezentovano je i osnivanje „Call centra“ za podršku strankama. Isti bilježi odlične rezultate, a u planu je i proširenje kapaciteta u smislu angažmana dodatnih 10 sudskih izvršitelja za rad na terenu.

Trenutni fokus je na uspostavi kvalitetnijeg sistema za protok informacija između pravnih službi komunalnih preduzeća i osnovanog „Call centra“ za podršku građanima, a najavljen je i kapitalni proje-

kat uspostave jedinstvenog aukcijskog centra za prodaju zaplijenjenih pokretnih stvari u izvršnom postupku. Za potrebe ovog jedinstvenog projekta u narednom periodu će na raspolaganju biti i vozilo sa potrebnim kapacitetima za organizovano postupanje sudskih izvršitelja u punom kapacitetu na terenu, a što će za cilj imati intenzivniji rad po ovoj vrsti predmeta.

Na sastanku je istaknuta potreba redovnog izmirivanja i naplate sudske takse kako sud ne bi poduzimao mjere prinudne naplate sudske takse budući da je prisutan trend neplaćanja iste od strane pojedinih komunalnih preduzeća.

Razmotren je i prijedlog za uspostavljanje naplatnog centra svih tražioca izvršenja u blizini zgrade suda, a prezentovan je i naredni projekat Općinskog suda u Sarajevu koji se odnosi na osnivanje jedinstvenog aukcijskog centra za prodaju pokretnih stvari koji će u narednom periodu biti u funkciji.

Jasno je definisana uloga svih uče-

snika prema Akcionom planu Vlade KS u ovom projektu čiji jedinstveni cilj predstavlja kvalitetniju i bržu naplatu u predmetima koji su pokrenuti pred ovim sudom, a odnose se na naplaćene komunalne usluge i podršku građanima u navedenim predmetima.

Jedan od zajedničkih zaključaka sastanka je potreba za ažuriranjem baza podataka od strane komunalnih preduzeća u narednom periodu, a najavljene su i buduće analize na određenom uzorku te redovno i ažurno dostavljanje povlačenja prijedloga radi izmirenja duga. Razmatran je i prijedlog za automatsko uspostavljanje uplatnica za izvršnice sa jedinstvenim QR kodom kako bi se lakše realizovala naplata potraživanja putem mobilnog plaćanja.

Sastanku su prisustvovali predstavnici Općinskog suda u Sarajevu, komunalnih javnih preduzeća u Kantonu Sarajevu kao i predstavnici VSTV BiH te Agencije za izvršenja iz Švedske. ■

Saradnja Općinskog suda u Sarajevu i RAK-a ocijenjena kao uspješna

Redovni godišnji sastanak predstavnika Općinskog suda u Sarajevu i Regionalne advokatske komore Sarajevo održan je 09. aprila 2025. godine u biblioteci Općinskog suda u Sarajevu.

Na sastanku su razmatrana aktuelna

pitanja u vezi sa efikasnošću sudskih sa posebnim osvrtom na postupanje suda u izvršnim postupcima te u zemljišnoknjižnim predmetima. Razmatrano je i pitanje komunikacije advokata sa sudom, a sve s ciljem prevazilaženja pojedinih

problema i unapređenja postojeće saradnje suda i RAK-a.

Po završetku sastanka prisutni su iskazali zadovoljstvo te je istaknuta važnost nastavka ovakvih susreta radi unapređenja saradnje i efikasnijeg rada pravosuđa. ■





▲ Sutkinja Selma Beširević Čizmo (desno) nma sastanku u Kabinetu predsjednika suda

Tokom 2025. godine VSTV BiH imenovao četiri nositeljice pravosudnih funkcija u sarajevskom Općinskom sudu

Visoko sudsko i tužilačko vijeće Bosne i Hercegovine (VSTV BiH) je tokom 2025. godine na održanim sjednicama donijelo odluku o imenovanju četvero nosilaca pravosudnih funkcija u sarajevskom Općinskom sudu. Za sudije su imenovane Selma Beširević Nurković i Ena Granić Čizmo, dok su za

stručne saradnice imenovane Elma Bračković i Lejla Hasić.

Pri donošenju Odluke o imenovanju, VSTV BiH je uzeo u obzir kriterije poput: stručnog znanja, radnog iskustva i radnih rezultata; stručne sposobnosti zasnovane na dosadašnjim rezultatima u karijeri; sposobnosti da

nepristrano, savjesno, marljivo, odlučno i odgovorno obnaša dužnosti u okviru funkcije za koju se prijavljuje; odnosa sa radnim kolegama, ponašanja van posla, profesionalne nepristranosti i ugleda te iskustva na rukovodećim poslovima. Pri imenovanju, VSTV BiH primjenjuje odgovarajuće



ustavne odredbe kojima se uređuju jednaka prava i zastupljenost konstitutivnih naroda i ostalih, te poštuje ravnomjernu zastupljenost spolova. ■



▲ Sutkinja Ena Granić Čizmo (lijevo)



▲ Stručne saradnice Bračković i Hasić

Na regionalnom simpoziju u Podgorici učestvovala i sutkinja Općinskog suda u Sarajevu

Anja Laštro, sutkinja Općinskog suda u Sarajevu, prisustvovala je regionalnom simpoziju na temu “Upravljanje komercijalnim sposobnostima za kibernetičke upade”, a koji je održan 12. decembra 2025. godine U Centru za sajber kapacitete Zapadnog Balkana (WB3C), u Podgorici. Isti je organizovalo Ministarstvo vanjskih poslova Francuske, a implementirala organizacija Expertise France, u okviru granta Evropske komisije kroz Sporazum o višepartnerskom doprinosu (#MPCA) za sajber sigurnost i vještačku inteligenciju.

Tokom simpozija učesnici su imali priliku razgovarati o rastućem izazovu širenja kibernetičkih upada i neodgovornog korištenja kibernetičkih kapaciteta, dešifriranja “Pall Mall” procesa (osiguravanje odgovorne upotrebe komercijalnih mogućnosti kibernetičkih upada od strane države), razmijeniti nacionalna iskustava te identifikovati izazo-



ve i smjernice u ovoj oblasti. Među ciljevima simpozija prepoznata je potreba da se ojača upravljanje i nadzor nad komercijalnim kapacitetima za kibernetičku infiltraciju, spriječiti zloupotreba alata za kibernetičku infiltraciju definisanjem načina na koji se operacije trebaju provoditi u strogo utvrđenim pravnim i etičkim granicama, podsticanje usklađivanja s međunarodnim normama (UN, EU, regionalne konvencije) te podržavanje kooperativnih pristupa koji poma-

žu partnerskim državama da suzbiju proliferaciju i neodgovornu upotrebu komercijalnih kapaciteta za kibernetičku infiltraciju.

Održani simpozij unaprijedio je znanje učesnika o odgovornom korištenju kibernetičkih kapaciteta i zaštiti od kibernetičke infiltracije te znatno doprinio ličnom i profesionalnim napretku sutkinje Laštro koja je pozvala svoje kolege da uzmu učešće u nekom od narednih simpozija i/ili obuka iz ove oblasti. ■

Regionalnoj radionici na temu pranja novca prisustvovala sutkinja Nermina Kulenović

Regionalna radionica o promociji Kompendijuma presuda u predmetima pranja novca održana je 28. oktobra 2025. godine u Podgorici (Crna Gora), a istoj je prisustvovala i sutkinja Krivičnog odjeljenja Općinskog suda u Sarajevu, Nermina Kulenović. Na radionici je predstavljen Kompendijum presuda u predmetima pranja novca — praktični alat osmišljen da podrži sudstvo u rukovođenju složenim slučajevima finansijskog kriminala, promovise dosljednost u presudama i unaprijedi sudijske kapacitete u oblastima koje se tiču finansijskih dokaza i povraćaja imovine.

Učesnici radionice upoznati su sa smjernicama i preporukama za podršku u rješavanju složenih finansijskih



predmeta te je zaključeno da je potrebno jačati regionalni dijalog i saradnju između sudija i institucija za obuku sudija na Zapadnom Balkanu. ■

Sutkinja Općinskog suda u Sarajevu učestvovala na Zimskoj akademiji u Atini

Sanida Vahida Ramić, sutkinja Općinskog suda u Sarajevu, učestvovala je od 09. do 12. decembra 2025. godine na Zimskoj akademiji – Pravna saradnja u prekograničnom organizovanom kriminalu: Trening za praktičare s područja Zapadnog Balkana. Sutkinja je na edukaciji uzela aktivno učešće sa timom kolega, novoimenovanih sudija i tužilaca iz Bosne i Hercegovine. Trening je organizovan od strane WBCJ (Western Balkans Criminal Justice), u kooperaciji sa Sekretarijatom JITs Network (The Network of National Experts od Joint Investigation Teams) i EUROJUST (EU Agency for Criminal Justice Cooperation).

Cilj treninga bila je obuka i sticanje vještina za novoimenovane sudije i tužioce sa područja Zapadnog Balkana iz oblasti međunarodnih krivičnih istraga, sa posebnim fo-



kusom na krivična djela finansijskog kriminala, pranje novca i krivična djela cyber kriminala povezan sa kriptovalutama.

Kroz prezentovanje uloge EUROJUST-a, JIT Mreže, istražnih organa i kontaktnih tačaka u kompleksnim zajedničkim istragama,

trening je na sveobuhvatan i praktičan način prikazao modalitete saradnje država članica EU i zemalja koje još uvijek nemaju status članica EU u prekograničnom organizovanom kriminalu putem sistema koordinacije posredstvom zajedničkih istražnih timova (JIT). ■

Sudije Općinskog suda u Sarajevu boravile u studijskoj posjeti Bonnu (Njemačka)

U organizaciji Centra za edukaciju sudija i tužilaca Federacije BiH te Njemačke fondacije za međunarodnu pravnu saradnju (IRZ), sudije Općinskog suda u Sarajevu Kenad Osmanović i Nina Šeremet boravile su od 6. do 11. jula 2025. godine u radnoj posjeti u Bonnu (Njemačka), a na temu „Efikasno i aktivno vođenje sudskog postupka“. Zajedno sa novoimenovanim sudijama iz FBiH imali su priliku učiti o modelu otvorenog vođenja rasprave te da na konkretnim primjerima i kroz praćenje suđenja uočiti koliko je uloga sudije aktivna, a posebno u nastojanju postizanja sudske nagodbe.



Ova studijska posjeta bila je jedinstvena prilika da novoimenovane sudije steknu dodatna znanja i vje-

štine koje će im koristiti svakako u budućem radu. ■

Sutkinja Fajić Poturović na konferenciji u Splitu predstavila dio izvještaja pod nazivom “Pripremne faze parničnog postupka”

Kao predstavnica Radne grupe za upravljanje sudovima, Vildana Fajić Poturović, sutkinja Općinskog suda u Sarajevu, učestvovala je 07. i 08. oktobra 2025. godine na konferenciji održanoj u Splitu, a na kojoj je predstavljen Finalni izvještaj Radne grupe za upravljanje sudovima (WGJM) u okviru projekta Judicial Reform Programme for the Western Balkans. Isti realizuje Norveška pravosudna uprava (Norwegian Courts Administration) uz podršku Ministarstva vanjskih poslova Norveške.

Izvještaj predstavlja rezultat višegodišnjeg zajedničkog rada stručnjaka iz pravosudnih institucija zemalja Zapadnog Balkana, a na temu „Proceduralnih prepreka za usklađenost s članom 6 Evropske kon-



vencije o ljudskim pravima“ (prava na pravično suđenje).

Finalni izvještaj je predstavljen i članovima sudskih savjeta zemalja Zapadnog Balkana, čime je zaokružen značajan segment projekta koji doprinosi unapređenju efikasnosti i pravičnosti sudskih sistema u regiji. Dio Izvještaja pod nazivom

“Pripremne faze parničnog postupka“, a u čijoj je izradi učestvovala i Amela Mulić, sutkinja Općinskog suda u Sarajevu, 7.10.2025. godine prezentovala je Vildana Fajić Poturović, sutkinja Općinskoga suda u Sarajevu, koja je članica Projekta od 2023. godine. ■

Sutkinja Sanela Vrbanjac boravila u studijskoj posjeti Pragu

Uz podršku Ministarstva vanjskih poslova Republike Češke, Transparency International u Bosni i Hercegovini (TI BiH) je u saradnji sa Transparency International Republike Češke organizovao studijsku posjetu Pragu u periodu od 21. do 25. aprila 2025. godine, a u istoj je učestvovala i Sanela Vrbanjac, sutkinja Općinskog suda u Sarajevu.

Cilj ove studijske posjete bila je razmjena iskustava i učenje iz prakse od zemalja koje imaju dugogodišnje iskustvo u uspostavi, upravljanju i korištenju registra privrednih društava i registara stvarnih vlasnika.

Predstavnicu bh. institucija, kao



učesnici studijske posjete Pragu, imali su priliku sastati se s relevantnim stručnjacima iz oblasti prava, finansija, ekonomije, te predstavnicima relevantnih institucija koji se bave pitanjima stvarnog vlasništva i sprečavanja pranja novca u Češkoj Republici, registrima pri-

vrednih društava, diskutovati o aktuelnim pitanjima i izazovima, te razgovarati o najboljim pristupima i najboljim praksama uspostavljanja i upravljanja registrima stvarnih vlasnika i njihovoj ulozi u borbi protiv korupcije i pranja novca. ■



Sutkinja Belma Čano Sejfović prisustvovala Konferenciji OSCE-a na temu jednakosti spolova

U organizaciji OSCE-a, u palači Wertheim u Beču (Austrija) 06. i 07. maja 2025. godine održana je Konferencija o ravnopravnosti spolova – „Jačanje otpornosti kroz uključivanje i osnaživanje“ kojoj je prisustvovala i Belma Čano Sejfović, sutkinja Krivičnog odjeljenja Općinskog suda u Sarajevu. Konferenciju je na engleskom jeziku pratilo oko 400 učesnika iz 57 država - članica OSCE-a, a tokom dva dana organizovana je kroz tematske panele.

Osnovni cilj konferencije bio je podstaći pojačano djelovanje država članica OSCE-a na unapređenje rodne ravnopravnosti. Kao dio Konferencije, predstavljena je Ma-

pa puta za efikasnu implementaciju obaveza o ženama, miru i sigurnosti. Mapa puta pruža sveobuhvatan pregled rada OSCE-a u sprovođenju agende za žene, mir i sigurnost te poziva države članice da pojačaju svoje napore kroz konkretne mjere. Sutkinja Belma Čano Sejfović je uzela aktivno učešće u Panelu pod nazivom „Prevenција nasilja protiv žena i djevojčica“, a u kojem je iznijela konkretne poteškoće sa kojima se sudovi i pravosuđe u cjelini suočava, te nastojala ukazati koje su konkretne prepreke i izazovi koji su zajednički državama članicama OSCE-a i na čemu bi se, zapravo, trebalo raditi, a sve s ciljem prevencije nasilja prema ženama i djevoj-

čicama te borbe sa takvim nasiljem. Zaključci ovog panela su da je potreban veći angažman država članica na usvajanju odgovarajućeg pravnog okvira za borbu protiv nasilja nad ženama, da je potrebno uskladiti domaće propise sa Istanbulskom konvencijom i preporukama GREVIO-a, da je neophodan sistemski i multidisciplinarni pristup u borbi protiv nasilja nad ženama, kao i adekvatno finansiranje i budžeti koje donose nadležne ustanove. Posebno je istaknuta važnost kontinuirane edukacije svih učesnika u postupku - policije, tužilaca i sudija, a sve sa ciljem podizanja svijesti i razbijanja nesvjesnih predrasuda i stereotipa. ■

Anja Laštro, sutkinja Općinskog suda u Sarajevu, učestvovala na međunarodnoj konferenciji u Strazburu

U okviru projekta Vijeća Evrope i Ministarstva pravde Luksemburga, 17.03.2025. godine u Strazburu je održana Međunarodna konferencija pod nazivom „Bolja provedba nacionalnih sudskih odluka: Uslov za ljudska prava i vladavinu prava“, a u kojoj je učestvovala i Anja Laštro, sutkinja Izvršnog odjeljenja Općinskog suda u Sarajevu.

Učesnici konferencije imali su priliku razmijeniti iskustva i praksu u vezi sa nacionalnim zakonodavstvom i postupcima provođenja izvršenja odluka nacionalnih sudova sa fokusom na sljedeće principe: sudsku praksu Evropskog suda za ljudska prava o izvršenju domaćih presuda, izazove: rješavanje sistemskih i strukturalnih problema neizvršenja domaćih presuda kao uslova za izvršenje presuda Evropskog suda za ljudska prava te moguća rješenja: najbolje prakse, alati, modeli i opći principi. Generalni zaključak konferencije je da je potrebno unaprjeđenje legislative Vijeća Evrope u koraku sa digitalizacijom, a potom, sa tim, i usklađivanje za-



konodavstva država članica u cilju bolje stručne saradnje i efikasnijeg izvršenja sudskih odluka, kao i potreba kontinuiranog educiranja iz ove oblasti. Stečeno iskustvo i znanje sutkinja smatra ličnim i profesionalnim napretkom od značaja za budući rad te poziva kolege da uzmu učešće u nekoj od narednih konferencija. ■

Adela Bejtović Janušić, sutkinja Općinskog suda u Sarajevu, u studijskoj posjeti Evropskom sudu za ljudska prava

Tokom februara 2025. godine Adela Bejtović Janušić, sutkinja Općinskog suda u Sarajevu, boravila je u studijskoj posjeti Strazburu gdje je radila u Evropskom sudu za ljudska prava. Sutkinja je imala priliku ispitivati urednosti aplikacija te raditi na predmetima koje su građani Bosne i Hercegovine, Srbije i Crne Gore pokrenuli protiv svojih zemalja.

Pored prezentacija u svrhu upoznavanja sa organizacijom rada suda i procesom kroz koji prolazi aplikacija od samog početka do eventualne meritorne odluke, sutkinja je imala jedinstvenu priliku prisustvo-

vati na tri ročišta Velikog vijeća Evropskog suda u predmetima koji se odnose na eventualnu povredu ljudskih prava u postupcima postupanja sa migrantima na granicama evropskih zemalja, odnosno pratiti izlaganja predstavnika država, aplikanata, ali i trećih lica, umješača u tim predmetima.

Ova radna posjeta Evropskom sudu za ljudska prava realizovana je zahvaljujući projektu Vijeća Evrope koji služi za podršku dosljednoj nacionalnoj implementaciji Evropske konvencije o ljudskim pravima i olakšavanje izvršenja presuda Evropskog suda za ljudska prava u



BiH, a čiji je cilj da opća populacija u Bosni i Hercegovini ima koristi od kvalitetnog pravosudnog sistema koji je usklađen sa ljudskim pravima. ■



Općinski sud u Sarajevu

Protok predmeta u 2025. godini

Vrsta predmeta	Broj neriješenih predmeta na početku perioda	Broj primljenih predmeta tokom izvještajnog perioda	Ukupan broj svih predmeta u radu	Broj predmeta koji su riješeni u izvještajnom periodu	Broj neriješenih predmeta
	I	II	III = I+II	IV	V = III-IV

Parnično odjeljenje - (34 sudija) - prosjek 158 predmeta po referatu

P	4.662	4.705	9.367	5.049	4.318
Radni	1.100	1.056	2.156	1.092	1.064
Ukupno	5.762	5.761	11.523	6.141	5.382

Privredno odjeljenje - (8 sudija) - prosjek 152 predmeta po referatu

Ps	1.135	1.021	2.156	1.049	1.107
L	118	211	329	198	131
St	129	89	218	92	126
Ukupno	1.382	1.321	2.703	1.339	1.364

Krivično odjeljenje - (13 sudija) - prosjek 73 K predmeta po referatu

K-K	783	959	1.742	799	943
K-Kpp	98	4308	4.406	4320	86
K-Kps	623	1088	1.711	1067	644
K-Kv	59	1767	1.826	1765	61
Km-Km	11	34	45	40	5
Km-Kmv	2	76	78	77	1
Km-Kpp	6	152	158	155	3
Km-KMpom	2	3	5	2	3
Ukupno	1.584	8.387	9.971	8.225	1.746
IKS	119	320	439	332	107

Izvršno odjeljenje - "I - Ip" - (24 sudija - 1 str.sar.) - prosjek 540 predmeta po referatu

I-I	6.166	5.863	12.029	6.582	5.447
Ip-Ip	1.090	1.530	2.620	1.300	1.320
POM	22	10	32	9	23
I-kom	739	194	933	121	812
Ip-kom	69	27	96	11	85
Mal-I-Ip	6.978	5.285	12.263	6.989	5.274
Ukupno	15.064	12.909	27.973	15.012	12.961

Vanparnično odjeljenje - (4 sudija + 3 str. sar.) - prosjek 143 V predmeta po referatu

V	585	1.551	2.136	1.563	573
O	6.141	6.480	12.621	6.210	6.411
Ukupno	6.726	8.031	14.757	7.773	6.984

Prekršajno odjeljenje opća nadležnost - (9 sudija) - prosjek 811 po referatu

Pr-Pr	14.247	12.573	26.820	19.563	7.257
Pr-ZM	0	374	374	372	2
Pr-Pls	120	63	183	139	44
Ukupno	14.367	13.010	27.377	20.074	7.303

Prekršajno odjeljenje inspekcijski nadzor - (5 sudija) - prosjek 766 po referatu

Pr	3.360	3.749	7.109	3.311	3.798
Pr-ZM	0	715	715	710	5
Pls	56	30	86	56	30
Ukupno	3.416	4.494	7.910	4.077	3.833

Ukupno Pr	17.607	20.419	38.026	25.004	13.022
Ukupno ZM	0	715	715	710	5
Ukupno Pls	176	111	287	225	62
Ukupno	17.783	21.245	39.028	25.939	13.089

Registar - (6 sudija) - prosjek 103 predmeta po referatu

Registracija poslovnih subjekata	632	5.617	6.249	5.631	618
----------------------------------	-----	-------	-------	-------	-----

Zk referat - (26 referenata) - prosjek 23 predmeta po referatu

ZK predmeti	640	30.704	31.344	30.859	485
-------------	-----	--------	--------	--------	-----

Odjeljenje za sporove male vrijednosti - (15 str.sar.) - prosjek 5.124

Mal-kom	61.440	5.034	66.474	12.151	54.323
Mal	8.190	3.129	11.319	3.413	7.906
Mals-kom	10.640	957	11.597	1.757	9.840
Mals	4.708	1.855	6.563	1.766	4.797
Ukupno	84.978	10.975	95.953	19.087	76.866

Izvršno odjeljenje po vjerodostojnim ispravama (6 str.sar.) prosjek 132.664/ref.

I	817.116	64.357	881.473	118.554	762.919
Ip	36.594	2.149	38.743	5.678	33.065
Ostalo*	0	0	0	0	0
Ukupno	853.710	66.506	920.216	124.232	795.984

Ukupno	988.380	171.776	1.160.156	244.570	915.586
---------------	----------------	----------------	------------------	----------------	----------------

Ostvarena norma po odjeljenjima:


Odjeljenje	Norma
Parnično	110,15%
Privredno	99,67%
Krivično	121,31%
Izvršno - " I - Ip "	114,90%
Vanparnično	114,92%
Prekršajno odjeljenje iz nadležnosti inspekcija	155,71%
Prekršajno odjeljenje opće nadležnosti	249,20%
Registracija poslovnih subjekata	132,00%
Odjeljenje za sporove male vrijednosti	149,56%
Izvršno - po vjerodostojnim ispravama	655,27%
ZK	105,12%
NORMA SUDA	151,38%

Kvalitet rada suda: 92,07%

Realizacija najstarijih predmeta: 92,18%

Norma suda: 151,38%

Struktura neriješenih predmeta na dan 31.12.2025. godine



2025. godina

OD UKUPNO 915.586 NERJEŠENIH 872.850 ILI 95,33 % ČINE KOMUNALNI PREDMETI, DOK JE 42.736 ILI 4,67 % STRUKTURNIH PREDMETA

42.736	Struktura
-12.961	Izvršni - struktura
-13.089	Prekršaji
-485	ZK
-618	Registar
-107	Iks-referat
15.476	1,69% - parnica i krivica

2024. godina

OD UKUPNO 988.380 NERJEŠENIH PREDMETA , 938.697 ILI 94,97 % ČINE KOMUNALNI PREDMETI, DOK JE 49.683 ILI 5,03 % STRUKTURNIH PREDMETA

49.683	Struktura
-15.064	Izvršni - struktura
-17.783	Prekršaji
-640	ZK
-632	Registar
-119	Iks-referat
15.445	1,56% - parnica i krivica

Općinski sud u Sarajevu

